

GERNIKA. Talde kulturalen, gazte taldeen eta zerbitzu publikoen barri emoten da bertan



ONINTZA ENBEITA

Gidearen azalean uriko erlojurik garrantzitsuenak agertzen dira, argazkian Eriako lorategietako ordularia.

Zerbitzu eta harreman gidea barriztauta argitaratu dabe

Gitxi gorabehera bost mila ale bananduko dabez etxerik etxe

Onintza Enbeita

Gernika-Lumoko Udalak uriko zerbitzuen gida barria argitaratu dau. Gidea 60 orrik osotzen dabe, eta hainbat komertzioaren publizidadetik aparte, uriko argazkiak, zerbitzuak eta taldeak hartu-emonetan jarteko telefonoak dakar.

Azalean Gernika-Lumoko 7 ordulari daukaz gideak: Lumoko elizakoa, epaitegia, Eriako lorategietakoa, Foruen plaza-

koa, tren geltokikoa, Batzar Etxea eta Euskal Herria museoak. Udaleko ordezkariak azaldu ebenez, mende barriaren etorrerea azaldu gura izan da ordulariakaz. Egia esan, argazkietan igarten da ez dirala erloju guztiak sasoi berekoak.

Lehen be argitaratu eben gidea Gernikan. Halandabe, gida barrian zaharrea egondako akatsak zuzendu dira. Gehienak inprenta hutsak edo akatsak izan ziran. Oraingo

gidan, zerbitzu gehiagoren barri emoten da eta uriaren ganeko informazio gehiago sartu dabe. Argazkiak be barriak dira. Gehienak, oraintsu atarata. Esate baterako, Elai Alai aretoa apirilean zabaldu zan, eta bertako argazkiak be badagoz gidan.

Uri guztian bananduko da gidea buzoiz buzoiz. Danetara, 10.000 ale kaleratu dira eta horreetatik erdiak zabalduko dira etxetara gitxi gora behera. Besteak, turismo bulegoaren esku itxiko dabez.

Alkatearen agurraren ondoren, aurkitu leike informazioa libruska barrian. Uriaren ganeko datu orokorrak hasi eta apurka-apurka taldeak zehazten doa informazioa. Talde kulturalen artean, esate baterako, izan dira aldaketak libruskearen barruan. Lehen agertzen ziran talde batzuk, orain ez dagoz, eta alderantziz. Ganera, gidea inprentan dagoala sortu diran taldeak kanpoan geratu dira.

Ibilbideak

Holakoetan beti emoten diran datuak kenduta, beste batzuk be sartu dauz Gernika-Lumoko Udalak gidearen barruan.

Monumentuak, jauregiak, museoak, eta abarregaz batera, uritik hasita egin leitekezane ibilbideen barri emoten dau libruskeak.

Lehenago Errege Bidea zana, itsasadarraren hegaletik Muruetarainoko paseoa eta Lumorako bidea zelan egin azaltzen dira gidan. Esan behar da, gidan aitatu ez arren, Forurako bidea be jente askok erabiltzen dauela ibiltelekutat. Halandabe, udabarri eta uda partean, itsasadarraren hegaleko bidea da, jente gehienak aukeratzen dauena.

Beste alde batetik, bonbakearen inguruko hainbat gومتakiren barri agiri da gidako orrietan: Gernika gudarostearen oroimenezko harria, Picasoren *Guernica* koadroaren kopia eta bonbaketan hil ziran aldeko harritzko esteela besteak beste.

Kaleen planoa

Zerbitzuen libruskeak uriko kaleen planoa dauka erdiko orrialdeetan. Halandabe, gidatik kanpo, beste 5.000 plano argitaratu dira. Batez be turismo bulegoan bananduko dira. Bisitariengan pentsauta argitaratu da izan be, kaleen ganeko gidea.

Kaleak auzoka bananduta dagoz, eta kale bakotxa zein dan zenbaki bidez azaltzen da. Planoan zenbakiak dagoz, eta ondoan zenbaki bakotxari jagon kaleen zerrendea dago. Planoaren beste atal baten, Gernika-Lumo Europako, Euskal Herriko eta Urdaibaiko mapetan kokatzen da.

MUXIKA

Bagilaren hamarreen ospatuko dau bertso eskoleak bere eguna

O. E.

Muxikako Garriko bertso eskoleak urtero antolatzen dau bere jaialdixoa. Aurtongoa, bagilaren 10ean izango da, eta urteroko moduan bertso idatzien sariketea izango da.

Sariketea goizeko 11:00etan hasiko da eta 12:00etarako egin beharko dabez parte hartzaileek euren bertsoak. 11 urtera artekoek bertso bat egin beharko dabe, 12 eta 13 urte daukiezanek bina eta 14 urtetik 18 urtera artekoek hiruna. Denporea, barriz, danentzat izango da ordu betekoa. Gaia ezbardina izango da talde bakotxarentzat, eta bertan egunean emongo da.

Bizkaiko bertsolari gazte guztiei zabaldua dago lehiaketea, eta bagilaren 3a baino arinago emon beharko da izena.

Sariketearen barri inguruko eskola eta ikastoletan zabalduko da. Orduan, askok izango dabe izena ikastetxean emetoko aukerea. Halandabe, 94 625 32 49 (Xabier) edo 94 625 36 02 (Zihara) telefonoetara deituta be, emon ahal izango da izena. Osterantzean Garriko bertso eskolan apuntau leike zuzenean. Normalean, bariku iluntzeko 19:30etik 21:00ak ingurura arte egoten da jentea bertan.

Sariak

Maila bakotxeko txapel-dunari garrikoa emongo jako. Bertso eskolearen izena jakinda, logikoa be bada. Irabazle gazteenari garriko berdea emoten jako, ertainari gorria eta nagusienari baltza. Maila bakotxean bigarren gertzen diranek garaikur bana jasoko dabe.

Sari bereziak be zozketatuko dabez parte hartzaile guztien artean. Izena emon ahala, zenbakia emoten jake parte hartzaileei, eta horrek zozketarako balio izaten dau.

Bestela be, izaten dira sai bereziak. Normalean, lehenengo eta bigarren saria emon ondoren, atean geratu diranak izaten dira sari hori jasoten dabena.

Laburmetraien emonaldia eskainiko dabe, bihar arratsaldean, Elai Alain

O. E.

Aurton egingo da seigarrenez *Kaspa Hutsa* laburmetraia emonaldia. Bihar arratsaldeko 19:00etan hasita, zazpi laburmetraia ikusi ahal izango dira Elai Alain aretoan.

Sarrerarik ez da ordaindu behar izango, eta honeaxe izango dira laburmetraiak: *Psicoman contra Superzorra*, *Para espectadores indiscretos*,

Espiderman ya no vive aqui + El imperio de La Sandez, *Donosti horror freak show*, *Tres tristes traumas*, *Kit sorpresa* eta *Bizarro*.

Freak izeneko estiloa jorratzen dabe laburmetraia gehienek. Antolatzaileek azaldu dabenez, nazkea emoten daben eskenak eta barre eragiten daben puntuak nahasten dauz modan dagoan estilo barri horrek.